

禮

記

章

句

禮記章句卷六

船山遺書十三

衡陽王夫之譏

月令

月令一篇舊云呂不韋所作今呂氏春秋十二紀之首
具有此文而管子淮南子亦皆有之特其文小異惟呂
氏春秋與此異者不過數字是以知其所傳自呂氏出
也先王奉天出治敬授民時蓋亦有斯義焉而夏小正
及素問所記時物亦參差略同不韋本以賈人繇嬖倖
爲秦相非能自造一家言者且其駟僞詭亦不能依
附正道而此篇所紀亦略髣髴先王之政教蓋戰國之

時教散說殊八家之儒與雜流之士依傍先王之禮法
雜纂而附會之作爲此書而不韋以權力襲取搶爲己
有戴氏知其所自來非呂氏之獨造而往往與禮相近
故采之於記以備三代之遺法焉至不韋之雜以權謀
者則槩從刪斥可謂辨矣願其謂明堂十二室王者隨
月居之以出政立說舛異與五經不合而後世公玉帶
之流創爲欹側零星非法之屋謂之明堂蔡邕祖而爲
之施及拓拔宏武盟緣飾猥蝶蓋自此始其爲戰國游
士設立虛名以驚聽觀旣無足疑若夫先王敬授之義
止以爲民農桑開斂之計未嘗屑屑然師天之寒暑陰

陽襲取以爲道法此篇所論刑賞政教拘牽時數抑不
足以憲天而宜民且災祥之至謂爲人感者要以和則
致祥乖則致戾爲其大較至祥沴之至或此或彼天造
無心亦奚必以此感者卽以此應拘於其墟而不相移
易哉君子恐懼修省敬天災而恤民患亦盡道於己而
天卽不違執一成之應感以逆億天心徒爲妄而已矣
易曰天地設位聖人成能設位者天成能者人仰于其
位而自替其能固已殊異乎君子之道而後世變復之
耶說流爲讖緯以惑世誣民皆自此興焉自漢以來未
能絀此篇於五經之外今姑因其說之可通者而詮釋

之其事理之不足信從者則亦略之而已凡十三章

孟春之月日在營室昏參中旦尾中

孟春夏正歲首建寅日月會於娵訾之月也建寅者斗柄第一星指寅方也地有十二方天有十二次十二方者東南西北圍遶周遭正北始於子北西合於亥十二次者上下東西圍遶周遭天中爲午地中爲子東正爲卯西正爲酉而二十八宿日移一度左旋環之起女二度入元枵之次至女一度終娵訾之次也北斗隨時自運斗柄一星居常不動餘六星圓轉周回斗柄因之而易所指日遷月移以大槩言之則十二月指地之十二

方也月有朔歲有十二中氣此言月者中氣必在其月之內實則自立春訖驚蟄前一刻三十日有奇之內皆孟春也餘放此太陽東行日移一度歲而周天以常計之每一中氣行三十度有奇爲一次古今歲差所積率六十七年而差一度此據周秦之際日在斗二十三度爲冬至則立春日在危十二度雨水日在室十一度然此篇十二月所記或先或後不能盡合則記者之未審也若以大統漏法算之冬至日在箕五度初則雨水日在危六度而日月會於元枵之次矣中星者二十八宿三百六十五度萬分度之二千四百二十五分一日左

旋一度當晨星欲隱昏星始顯之際於南方正中午位
測之以紀天行也此云昏參中且尾中者亦周秦之際
之大較也十二月所記以日躔相去較之亦多不合皆
記者之疏爾歲差所積至於今麻則雨水昏中畢十三
度且中房三度末矣記日躔審中星皆以記天及太陽
所行之舍爲太陰五星周合之本蓋洽麻之事也

其日甲乙其帝大皞其神句芒其蟲鱗其音角律中大簇
其數八其味酸其臭羶其祀戶祭先脾

大他蓋反句古侯反中丁仲反後律

中之中皆同
籩七豆反

曰其日者以爲擇日之用也春王在木甲乙者木幹故

凡春以甲乙之日爲王而吉也餘放此帝古之有天下者太皞伏羲氏周末鄒衍之流推五德迭王之說謂太皞以木德王餘四帝放此神者造化之精爽句芒春時草木句屈芒萌而生故謂其神曰句芒迎春則祀之動物之屬皆曰蟲鱗者魚類至春而盛以紀取之之候也餘四蟲放此音者律之祖律者音之辨也紀音律者所以著其損益生合之數與天爲合或曰以其管吹灰候中氣之至古有此法要其驗否未可知也角者三分羽益一以生其數六十四濁清之中也太簇林鐘上生之律長八寸蔡氏曰積十五萬七千四百六十四分其數

者所以決卜筮之用也八木之成數於河圖位在東故應乎春凡四時之數皆用成而不用生者以下筮用七八九六而不用一二三四象必成而後效也酸者木之味羶者木之臭紀味與臭者辨其原本於五行之化使服食者得因其運氣與府藏之虛實而損益之爲補瀉也祀謂五祀自大夫以上達於天子之所祀戶室戶自內向外出者之所先興起有事象春之生也四時各有一祀而每月言之者謂此三月之內隨一月而可祀也祭祭始制飲食者於豆鬮先者謂食庶羞時品祭品嘗而此先之也脾土藏木克土以所克者爲養之重妻養

夫之義也

東風解凍蟄蟲始振魚上冰獺祭魚鴻雁來

解佳買反
上時掌反

凍凌也振動也淮南子振下有蘇字蘇者更生之意上
冰者冰面未釋而下已解魚山上近冰也淮南子冰上
有負字夏小正上作陟義尤通獺祭魚者冰釋魚出而
獺獵之也鴻雁之大者呂氏春秋作候言鴈可以候時
也來者王都在北於時鴈自江南而北也凡諸氣至物
候之應必詳之者以審物理而前民用使觸物而知農
桑佃魚土功之節違寒避暑之度也盡此一中氣之中
諸候之應或前或後非必有定十二月之候多少詳略

亦無定數後世麻家更爲增損限之以七十二而每候
五日先後不移則既泥而不通而蔡氏用之演九疇之
數其亦固矣

天子居青陽左个乘鸞路駕倉龍載青旂衣青衣服倉玉
食麥與羊其器疏以達

載都代反衣青之衣
於既反篇內並同

青陽左个舊說以爲明堂十二室其東三室曰青陽左
个則其北偏室也鸞鈴也鸞路縣鈴於路車之鑣上倉
與蒼通深青色馬八尺曰龍載建之車上也服謂冠飾
及佩食麥與羊其說不可曉按素問四時所食之穀畜
錯見不一皆與此不同要皆拘牽附會之言非有理據

也器食器疏以達者刻鏤疏通而形製廓達也凡此事
理穿鑿法制詭異考之三王之制皆所不合蓋周末小
道繁興以私意比擬而創立之以成一家之言謂可俟
後王之施行然不韋祖之以爲立說之本而卒不能用
之於秦況聖人之創制顯庸以體天而宜民者乎

是月也以立春先立春三日大史謁之天子曰某日立春
盛德在木天子乃齊立春之日天子親帥三公九卿諸侯
大夫以迎春於東郊還反賞公卿諸侯大夫於朝命相布
德和令行慶施惠下及兆民慶賜遂行毋有不當

先悉薦
反大史

之失他蓋反下同齊側皆反還似宜反朝
道遙反相息亮反施以威反當丁浪反

以立春者言以立春爲是月之始也其或因閏而在前
歲十二月者亦卽以其日爲春始矣餘三時放此立者
始基之辭謁告也盛德謂天德之成化者相戰國官名
百官之長視周之冢宰慶賞善也惠補不足也慶賜遂
行者行之於侯國慶以地賜以車服

乃命大史守典奉法司天日月星辰之行宿離不貸毋失

經紀以初爲常

司相吏反宿息教反離卽
計反貸與忒同他得反

大史兼掌天文麻法在周則馮相保章氏屬之典者一
定之常式法者推步增減之活法司與伺通候也察也
日之躔月之離五星之遲疾進退伏見皆以二十八宿

之辰爲之度分而考較之所謂經也宿者日與辰行之
次離者月與五星周合之分所謂紀也貸差也初始也
謂麻元也以初爲常者推測勘驗必與麻元合以爲常
也孟春一歲之首故命大史守儀法以考驗去歲所頒
新麻之得失也

是月也天子乃以元日祈穀于上帝

十幹謂之日元日上辛也舊說以爲此卽郊也按仲冬
之月無郊祀之文則記月令者或卽以此當郊然祈與
報殊郊特牲以郊爲大報天於義爲允而此專以祈穀
爲言則亦非所以事天矣

乃擇元辰天子親載耒耜措之于參保介之御閒帥三公九卿諸侯大夫躬耕帝籍天子三推三公五推卿諸侯九推反執爵于大廡三公九卿諸侯大夫皆御命曰勞酒所帥

律反推他同
反勞力報反

十二支謂之辰元辰上亥也耒覆土者今謂之犁壁耜起土者今謂之犁頭參參乘保衣介甲謂車右也御閒者御居中右居右當二人所立之閒也措耒耜於此稍遠於天子尊者雖躬親有事不敢以事期之也籍之爲言借也借民力以終畝也帝籍以其棗盛奉郊廟而獨言帝者統於尊也推謂推動耒耜行一匝下言大夫御

而此不言大夫推數者略文按國語大夫二十七推士當八十一推庶人終千畝也執爵蓋用燕禮大寢路寢御侍也士旅酬堂下不得獻故不在御列勞息其勞也三代耕籍之禮他亡所考僅見國語及此篇爾

是月也天氣下降地氣上騰天地和同草木萌動王命布農事命田舍東郊皆修封疆審端徑術善相丘陵阪險原隰土地所宜五穀所殖以教道民必躬親之田事既飭先定準直農乃不惑

術與遂通徐醉反相思亮反道徒到反

夫氣者太虛清剛之氣地氣者水土蒸升之氣也清剛之氣降則水土之氣以抑聚而屯合憤盈逸出於清霄

黃墟之間遇罅而充則草木資之振動而萌芽物有生
理而時雨亦將降矣故農事於此興焉布農事者發令
以修農政也田田峻舍次舍也四郊皆田獨言東郊者
田峻之行自東始也封疆井牧之經界阡陌之塍埒也
審者察水土高下之勢端者勿使迂曲礙耒耜也徑術
者周禮遂人所謂夫閒有遂遂上有徑遂廣二尺深二
尺之小溝徑廣二尺徒行之小路也言徑遂則溝畛澶
涂以上之皆審端可知舉小以槩大也善相審視之也
小曰邱岡足曰陵阪坡也險崎岸也高平曰原下平
曰燥溼肥瘠各有宜種之穀雖農人所喻而或

貪多得或幸早成種非其種以陷水旱必須田峻歲省而教導之躬親者雖窮鄉僻壤田峻必履畝而視之也凡此皆田之大政歲申飭之而又爲之定其高下之準縱橫之直使行水以防旱澇者各有定則焉蓋農人見近而味遠必田峻通爲相察乃能不惑而利於耕矣此三代田官勸農之政亦他亡所考而僅見於此凡此類則月令之不可廢者也

是月也命樂正入學習舞

樂正大司樂習教也國子之教樂舞樂德樂語此獨言舞者略文春秋教羽籥此其始也

乃修祭典命祀山林川澤犧牲毋用牝

修者申飭一歲所當舉之祀事也犧牲用牝爲不敬山林川澤且不用郊社宗廟可知已

禁止伐木毋覆巢毋殺孩蟲胎天飛鳥毋麇毋卵

覆如字
芳服反

天鳥
老反

禁禁其欲伐者止止其方伐者覆墮落之也孩小蟲殺胎未生而傷其母也殺天已生而戕其子也飛鳥求食哺子者麇獸子卵禽卵皆禁民取之所以息生理也

毋聚大眾毋置城郭

聚大眾謂治兵講武置立也農事方始早禁之也

掩骼埋胔

骼枯骨胔腐肉兼人獸而言謂古墓崩露及歿死之殘餘也

是月也不可以稱兵稱兵必天殃兵戎不起不可從我始稱舉也不可從我始敵加於己不得已而應之可也鄭氏曰爲客不利主人則可其義是矣

毋變天之道毋絕地之理毋亂人之紀

此節統論十二月之令皆當順時而行以起下行令違時則三才交咎之義其繫之正月者發例於始也

孟春行夏令則雨水不時草木蚤落國時有恐行秋令則

其民大疫疾風暴雨總至藜莠蓬蒿並興行冬令則水潦
爲敗雪霜大摯首種不入

恐欺用反
種之勇反

恐以謊言相恐嚇疾風回旋飄疾之風總至風挾雨至
藜莠藜莠似稷無實俗謂之狗尾草蓬似蒿尾端有絮
蒿邪蒿四者皆惡草與田閒盛生難爲芸也水潦爲敗
隄決敗田也摯甚也首種稷也不入謂水澇不能種也
凡行令不時災害之應記文旣穿鑿無徵註疏又雜以
術家之言相附會爲纖怪今皆不取學者勿惑焉

右第一章

仲春之月日在奎昏弧中旦建星中

仲春日月會於降婁而斗建卯之月也弧星當井十六度建星當斗十度斗井二宿度分廣遠故以其宿內小星志之也今以大統歷法算之春分日在壁三度昏井十六度中且箕四度中

其日甲乙其帝大暎其神句芒其蟲鱗其音角律中夾鍾其數八其味酸其臭膻其祀戶祭先脾

音同孟春

夾鍾夷則上生之律蔡氏曰全七寸四分三釐七毫三絲半三寸六分六釐三毫六絲積十四萬七千四百五十六分

始雨水桃始華倉庚鳴鷹化爲鳩

兩于付反華呼瓜反

雨水者謂始不全雨雪也倉庚黃鸝鳩爽鳩自其殺則謂之鷹自其不殺則謂之鳩按此記孟春蟄始振仲春始雨水蓋古麻以驚蟄爲正月中雨水爲二月節至劉歆作三統麻始兩易之

天子居青陽大廟乘鸞路駕倉龍載青旂衣青衣服倉玉食麥與羊其器疏以達

大他蓋反餘音同孟春後篇內並同

青陽大廟謂是東向正中之室

是月也安萌牙養幼少存諸孤

少許照反

牙與芽同木葉旁生謂之萌草茁上出謂之芽安者禁勿折之養幼少者婦人乳子則復除其征也存問而恤

之也諸孤幼而無父者

擇元日命民社

元日舊說以爲甲日按召誥社用戊今春秋社用立春
與立秋後第五戊沿召誥也民社所謂二十五家之置
社也命者使民祭之

命有司省囹圄去桎梏毋肆掠止獄訟

去起呂反
掠力讓反

有司司寇府史之屬省者審辨其輕者而釋之囹圄秦
獄名足械曰桎手械曰梏肆淮南子作笞掠捶擊也止
獄訟者禁民告訐若已告訐則立案不爲攝治

是月也玄鳥至至之日以大牢祠于高禘天子親往后妃

帥九嬪御乃禮天子所御帶以弓韣授以弓矢于高禴之

前

大他蓋反
帥所律反

元鳥燕也燕之乳子於人家室故以爲生子之祥祠祭也高禴古之始爲媒者妃三夫人不言世婦御妻者略文御陪祀也禮祝酌福酒飲之所御幸而有娠者帶佩也弓韣弓衣弓矢男子之所有事故以此祝令宜男也是月也日夜分雷乃發聲始電蟄蟲咸動啟戶始出先雷三日奮木鐸以令兆民曰雷將發聲有不戒其容止者生子不備必有凶災

先悉
薦反

日日出夜日沒分長

短刻同謂春分也雷無恆期而以

春分爲斷先雷三日者先春分三日也陽氣在地中當
春奮出則爲雷顧其發有大小出有緩急發之小以緩
則不足以有聲發之大以急於是成乎雷而有聲故謂
之雷乃發聲電者雷之光也其或電而不雷者陽出不
迅而稍散能爲光而不能有聲也戶蟄蟲穴竅啟去其
坏也蟲乘雷而出記之以紀雷候也木鐸適人所掌以
警戒衆者容止謂夫婦之事不備形體不全凶子天折
災母有孽難

日夜分則同度量鈞衡石角斗甬正權槩

量呂張反甬余驚反

同齊一之也度量謂度以量物長短尺丈尋仞也鈞平

也衡今之天平石若今鹽祖角較也甬斛也正審定之也權稱也槩所以平斗甬者正之勿使凸凹也

是月也耕者少舍乃修闔扇寢廟畢備

舍止也少舍者發土已未播種閒也闔扇門扉也寢居室自天子至於士皆有廟所修者但門扉之類功易竟也

毋作大事以妨農之事

大事大工役難竟者

是月也毋竭川澤毋漉陂池毋焚山林

川澤謂瀦堰大水以溉田者漉亦竭也畜雨水曰陂引

水而畜之曰池農事方始不當以魚鼈故失水利山林
長養材木方春焚之則不復生三者皆禁民爲之

天子乃鮮羔開冰先薦寢廟

鮮本獻字之
誤許建反

獻羔祭司寒也藏冰以供賓食喪祭之用仲春陽氣內
動地中已煥恐致消釋故開發其窮藏以出之先薦寢
廟者重其事薦而後頒之也凡薦之事皆於寢言寢廟
者見爲廟之寢也

上丁命樂正習舞釋菜天子乃帥三公九卿諸侯大夫親
往視之仲丁又命樂正入學習舞

帥所
律反

入學習舞者孟春教習國子至此考其小成更令演習

以待天子之視也釋奠也茶芹苽之屬奠之以祭先師
祭有脯醢特不殺而專言茶者尙鮮也天子帥公侯卿
大夫視學義見王制仲丁又命習者以天子視學以後
賢者舉之不肖者絀之餘且暫令休沐於此更令之學
也春夏習舞秋冬習吹以舞陽吹陰故偏舉言之實則
皆互習之也詩書禮皆教而專言樂者學以樂爲成以
是而考其成也

是月也祀不用犧牲用圭璧更皮幣

更古
衡反

更易也用圭璧皮幣更犧牲互文見意此節所言於禮
不合若此類蓋月令迂謬之尤者不可從

仲春行秋令則其國大水寒氣總至寇戎來征行冬令則陽氣不勝麥乃不熟民多相掠行夏令則國乃大旱煖氣早來蟲螟爲害

煖泥遠反

寇戎寇兵也征伐也掠侵奪蟲食苗心曰螟

右第二章

季春之月日在胃昏七星中旦牽牛中

季春日月會於大梁而斗建辰之月也以大統歷法算之穀雨日在婁五度昏星九度中旦牛二度中

其日甲乙其帝大暉其神句芒其蟲鱗其音角律中姑洗其數八其味酸其臭羶其祀戶祭先脾

洗蘇典反餘音同孟春

姑洗南呂上生之律蔡氏曰長七寸一分積十三萬九千九百六十八分

桐始華田鼠化爲鴛虹始見萍始生

萍呼瓜反見賢通反

桐岡桐其實可榨油者今南人候其花發乃漬稻種田鼠田閒之鼠鴛鶴子萍始生者柳絮始飛墜水中而爲萍也

天子居青陽左个乘鸞路駕倉龍載青旂衣青衣服倉玉食麥與羊其器疏以達

音同孟春

青陽右个謂是東鄉南偏之室

是月也天子乃薦鞠衣於先帝

鞠與鞠同邱菊反

鞠衣麤上黃塵如衣者時造鞠成將用釀酒故薦之

命舟牧覆舟五覆五反乃告舟備具于天子焉天子始乘

舟

覆如字芳服反反字袁反

舟牧典舟之官五覆五反審視內外加之灰釘也春深水將至治舟以備天子之乘云始乘舟者言五覆五反之後審其堅固而後天子可以乘之也

薦鮪于寢廟

鮪鯉之大者水生魚上初得大鯉漁人獻而薦之

乃爲麥祈實

爲子爲反

祈之於羣祀

是月也生氣方盛陽氣發泄句者畢出萌者盡達不可以

丙

句古侯反
內奴荅反

生氣物之氣也陽氣天之氣也句萌草木之芽苗內謂
收藏穀實句萌方出舊穀見風日則壞故窮藏者必先
藏之勿待此時若此月所登之物則不可藏故戒民勿
藏也

天子布德行惠命有司發倉廩賜貧窮振乏絕

振之
挺反

藏米曰廩藏穀曰倉貧無財窮無依乏暫無絕不繼也
振與賑同於時舊粟將盡新麥未登故振賜之

開府庫出幣帛周天下勉諸侯聘名士禮賢者

府庫幣帛之所藏勉勸勞之也王者於諸侯有時聘以
結好閒問以諭志皆以勞之名士賢之著者聘徵用之
其或不欲仕者則以幣賜而禮之

是月也命司空曰時雨將降下水上騰循行國邑周視原
野修利隄防道達溝瀆開通道路毋有障塞上時掌反道
達之道徒到

反

國王城內邑采邑原野郊外修者整其積圯利者順其
地勢道達疏浚之也溝瀆之上爲道路溝瀆濬則道路
通矣

田獵置罟羅罔畢翳餒獸之藥毋出九門

田獵者田獵之具弓矢矛戟之屬置杙上網罟兩轅網
皆獸網羅罔張樹間者畢有柄小網翳以茅結之用自
翳蔽縱媒致雉而射者餒獸之藥毒矢藥也九門王城
之門凡九也禁之於國門者以國中非田獵畢弋之地
禁令勿往郊外也

是月也命野虞母伐桑柘鳴鳩拂其羽戴勝降于桑具曲
植籩筐后妃齊戒親東鄉躬桑禁婦女毋觀省婦使以勸
蠶事蠶事既登分繭稱絲效功以其郊廟之服無有敢惰
籩居呂反齊側
皆反共九容反

母伐者令野虞禁民伐也並言柘者桑不足則以柘繼

之躬桑不言柘者公桑自足無待柘也鳴鳩搏穀鳥拂其羽者振迅以飛而且鳴也戴勝鳴鳩今俗謂之拔哥頭上有茸毛簇起如婦人之戴花勝然降者飛而下集以方省桑因見其降二者皆以記蠶候也具者繕具之於北郊蠶宮曲溥也如簞所以藉蠶者植薄架也籛與宮同方曰筐圓曰筥皆盛桑食蠶器東向者后不畱終蠶事一采以勸桑者惟就樹西面生氣爲禮也有夫曰婦在室曰女觀盛治容節此通禁國中婦女令急蠶功也省裁損也婦使酒漿脯醢縫紉之事此省宮中之事以急公蠶也分繭稱絲者分授而使之織紡凍治成則

稱其多少以課勤惰也郊廟之服祭服此節惟祭伐桑
柘及禁飾容觀爲勸民蠶之政餘皆言公蠶之事然王
后躬親於上如此之勤慎則民自不待督而自勤矣此
古之蠶政也無所考而僅見於此亦月令之不可廢者
也

是月也命工師令百工審五庫之量金鐵皮革筋角齒羽
箭幹脂膠丹漆母或不良百工咸理監工日號母悖于時
母或作爲淫巧以蕩上心
量呂張反監古
衡反作側个反

工師冬官之屬百工之長也五庫金鐵一皮革筋二角
齒羽三箭幹四脂膠丹漆五量者計其多少而用之金

銅也生日皮熟曰革箭爲矢之竹蒲幹材木爲車器者
脂以榦木爲輪丹朱砂考工記所謂以朱湛諸丹秫者
也咸理咸治其事號令之也時者燥溼寒暑之宜如木
宜燥漆宜溼之類淫巧過於巧也蕩者搖動而歆於侈
是月之末擇吉日大合樂天子乃帥三公九卿諸侯大夫
親往視之

大合者學者始各分習之今合并而奏其成也視之所
以養君德

是月也乃合累牛騰馬遊牝于牧犧牲駒犢舉書其數
累相重累騰躍也皆牡獸求牝之狀遊牝縱牝與遊使

之合也犧牲則禁其合駒犢則遊之書其數者除犧牲而課其孳生也

命國難九門磔攘以畢春氣

難諾何反
攘汝羊反

難與讎通國讎者惟天子諸侯行之時民農務方興勿使遊蕩而代爲之讎也磔裂牲以祭蓋用羊攘與禳通祭以除災也畢蹕也驅除之也春時溫氣雜寒而至多以夏初而成疫故示驅逐之此亦先王因俗之不可盡拂而無大害於義者聊仍之以安民心而制之自上限之以禮使毋私爲淫祀也

季春行冬令則寒氣時發草木皆肅國有大恐行夏令則

民多疾疫時雨不降山陵不收行秋令則天多沈陰淫雨

早降兵革並起

恐欺用反沈直深反

肅枯勁大恐譎言大起山陵不收謂高田旱而失種也
雨三日以上不止曰淫

右第三章

孟夏之月日在畢昏翼中旦婺女中

孟夏日月會於實沈而斗建巳之月也以大統麻法算
之小滿日在昴七度昏翼六度中旦危六度中

其日丙丁其帝炎帝其神祝融其蟲羽其音徵律中中呂
其數七其味苦其臭焦其祀竈祭先肺

徵張里反律中中之
中陟仲反中呂之

中直

眾反

夏王在火丙丁火幹故日以丙丁爲吉炎帝神農氏以
火德王祝融火神之號祝大融光也羽蟲禽鳥之屬夏
而成也徵三分宮去一下生之音其數五十四中呂無
射上生之律蔡氏曰全六寸五分八釐三毫四絲六忽
餘二算半三寸二分八釐六毫二絲二忽積十三萬一
千七十二分七者火之成數於河圖位在南苦者火之
味焦者火之臭也竈司火以養人故夏祭之肺金藏火
克金故爲養道之重

螻蟪鳴蚯蚓出玉瓜生苦菜秀

螻蝻蝻蛄蝻蛄聲相近俗謂之土狗王瓜栝樓也秀者榮而不實

天子居明堂左个乘朱路駕赤駟載赤旂衣朱衣服赤玉食菽與雞其器高以麤

戴衣音同孟春餘月同麤俗本作粗者誤

明堂左个南鄉東偏之室駟赤馬黑尾淺絳曰赤深赤曰朱麤大也

是月也以立夏先立夏三日大史謁之天子曰某日立夏盛德在火天子乃齊立夏之日天子親帥三公九卿大夫以迎夏於南郊還反行賞封諸侯慶賜遂行無不欣說

說
同孟春

封諸侯謂命諸侯之繼世受封者慶以地賞有功者賜以車服授有德者

乃命樂師習合禮樂

樂師大樂正習教也合備作申合其大成

命太尉贊桀後遂賢良舉長大行爵出祿必當其位當丁浪反

大尉秦官在周爲大司馬贊進也桀與傑通傑俊謂有才者遂達也成也達之在上位使其有成績也賢良有德者長大淮南子作孝悌於義爲通行序也出頒也當其位者以分職授位有成績而後加之爵祿也

是月也繼長增高毋有壞墮毋起土功毋發大眾毋伐大

樹

長丁丈反壤古
外反墮許規反

繼長增高謂土氣發越草木豐起相續而日盛也毋有
壤墮者卽下文斲土伐木之事發大眾者卽以任土功
也

是月也天子始締

締細葛天子服之下乃服也

命野虞出行田原爲天子勞農勸民毋或失時命司徒巡
行縣鄙命農勉作毋休于都

行下孟反爲于爲反
勞力報反作側个反

行徧至而省之也縣二千五百家鄙五百家六遂之屬
六鄉天子命虞至田閒勸農六遂則司徒行縣鄙命縣

鄙之吏自行田原也休息也謂或有事至都趣令速反
毋畱都邑曠農務也

是月也驅獸毋害五穀毋大田獵

所謂夏苗也

農乃登麥天子乃以彘嘗麥先薦寢廟

登成而收之也彘豕之大者味與麥相宜

是月也聚畜百藥

畜北
六反

聚採拾招聚之畜藏也百者舉大槩而總言之於時草
木方盛莖豐美根芟氣未大洩服食倍有力也

靡草死麥秋至斷薄刑決小罪出輕繫

繫丁
亂反

靡草弱草薺菜夏枯草之屬麥秋者方麥熟時有風雨
涼爽之氣如秋也薄刑墨扑之刑得小罪者服薄刑故
斷定而的決之其可宥者則因釋其囚繫

蠶事畢后妃獻繭乃收繭稅以桑爲均貴賤長幼如一以

給郊廟之服

長丁丈反

后妃獻繭者受九嬪之獻也乃收繭稅者公蠶既登則
知民蠶之畢於時而稅其絲也以桑爲均者因其田廬
而制其樹桑之數爲稅絲之等勤者有餘不多取惰者
不足不爲減也貴賤長幼如一者以婦人無他事雖貴
不免其征與士大夫之祿田不稅於公者異女子笄而

卽任婦功不得如男子餘夫之制也周禮以九職任萬民一曰嬪婦化治絲枲任者任其貢也如是則絲之入亦多矣宮中及頒賜之用皆取給焉獨言給郊廟之服者總承上獻繭而言舉重以統輕也

是月也天子飲耐用禮樂

酎者重釀之酒春造而夏始成也按飲酎之文他無所見漢人重之以獻宗廟蓋亦秦禮爾合羣臣重之以禮樂後世大酺之舉其迹此而爲與

孟夏行秋令則苦雨數來五穀不滋四鄙入保行冬令則草木蚤枯後乃大水敗其城郭行春令則蝗蟲爲災暴風

來格秀草不實

數所
角反

苦雨寒雨滋苗稼豐美鄙邊邑入保者入城邑而避兵
蓋有寇來侵也蝗蝻也格至也秀草麥也不實者風敗
之

右第四章

仲夏之月日在東井昏亢中旦危中

亢古
鄭反

仲夏日月會於鶉首而斗建午之月也以大統麻法算
之夏至日在參九度昏軫十六度中旦壁一度中

其日丙丁其帝炎帝其神祝融其蟲羽其音徵律中蕤賓
其數七其味苦其臭焦其祀竈祭先肺

音同
孟夏

蕤賓應鍾上生之律蔡氏曰全六寸二分八釐半三寸一分四釐積十二萬四千四百一十六分

小暑至螳蜋生鷓始鳴反舌無聲

鷓古反

鷓百勞反舌百舌鳥無聲不能爲宛轉之聲也

天子居明堂大廟乘朱路駕赤駟載赤旂衣朱衣服赤玉食菽與雞其器高以竊

大他蓋反

明堂大廟謂是南鄉正中室

養壯佼

佼長好貌謂草木於時壯盛長好當長養之禁摧折也是月也命樂師修鞀鞀鼓均琴瑟管簫執干戚羽譟等

笙篴簧飭鍾磬祝敵

類與鍾同徒乃反與磬同類迷反篴與簧同直難反

樂師者凡樂器各有師專司之如磬師鍾師之類習其器者卽令修之也鞀如鼓而小有柄有耳搖則自鼓鼓肅鼓靈鼓路鼓晉鼓鞀小鼓在大鼓旁與鼓相應均者適琴瑟之徽絃次管簫之比竹也古琴長三尺六寸六分五絃瑟長八尺一寸二十七絃管併兩竹而吹之簫編二十二管長尺四寸執謂執持而試其便舞與否也干盾戚斧戈鉤子戟三者武舞羽文舞也竽三十六簧笙十三簧大者十九簧皆列管匏中篴獨竹管長尺四寸八孔一孔上出寸三分橫吹之簧卽謂竽笙之簧鍾

磬有笙鏞二類編列於簨祝如漆桶方二尺四寸深一尺八寸中有椎柄連底撞之令左右擊敵刻木如虎背上有二十七齟齬以木長尺擦之

命有司爲民祈祀山川百源大雩帝用盛樂乃命百縣雩

祀百辟卿士有益於民者以祈穀實

爲于僞反
辟必亦反

百源小水之源雩吁嗟求雨之祭山川百源則用牲幣其於上帝惟用盛樂以感陽氣之和也百縣秦制周則六遂惟三十六縣也百辟古之諸侯卿士自卿至士古之名臣益功德也天子祈祀亦兼百辟卿士百縣亦雩縣內山川泉源不言者互文見之仲夏之雩勿論有雨

與否而皆祈之則用盛樂以致和氣若因旱而雩惟奠
瘞祭祀呼歎以祈無用盛樂之禮閔雨而憂不及樂也

農乃登黍是月也天子以雛嘗黍羞以含桃先薦寢廟

農

登黍四字當在是
月也之下蓋錯簡

晚黍孟秋乃登此所登者蔡邕所謂蟬鳴黍也以其蚤
熟故嘗而薦之雛雞雛含桃櫻桃多爲鳥所含去故名
含桃羞爲籩實也含桃雖佳果而物微故因薦黍薦之

令民毋艾藍以染毋燒灰毋暴布

艾魚旣反
暴蒲木反

艾與刈通穫也是月非刈藍之月而言毋艾者通計刈
削漚醱而言謂不可以藍染也燒灰所以凍布凍已則

暴之於時爲梅雨之候易至黠徽故禁

門閭毋閉關市毋索

索所
白反

門國門閭里門閉不常啟以待誰何索譏察過嚴也此與冬至閉關之說相對而設大要謂通商旅耳

挺重囚益其食

食詳
吏反

挺者舒弛之意寬其桎梏也食囚糧以日長多給之

游牝別羣則繫騰駒

游牝季春以來求牡之牝旣受胎則別羣矣繫別繫之毋令騰踏傷胎也不言累牛者略文

班馬政

班者序而頒之馬政牧養揀擇之法班之於廩校之官是月也日長至陰陽爭死生分君子齊戒處必掩身毋躁止聲色毋或進薄滋味毋致和節者欲定心氣百官靜事毋刑以定晏陰之所成

齊側皆反和胡臥反者時利反刑當作徑吉定反

長至暑極長而日北至也陰陽爭者一陰起於下而與陽爭也死殺氣陰生長養之氣陽也陰氣進則陽氣退死生之分肇於此也養生家謂陽不盡不死陰不盡不長生說蓋本此君子修身凝命之稱齊戒者卽下止聲色澹滋味之事若齊戒也掩身者時已暑不可袒裸防陰氣襲之也毋躁者靜以勝熱躁則飲水受風陰得乘

之矣止色而兼言聲者君子辭也致盡也和調和鹹酸也味以養陰故須薄之勿助陰氣也滋味曰耆聲色曰欲止色薄味則耆欲節矣耆欲節則陽不耗陰不盛心氣下交於腎而不蕩矣百官謂百骸之官竅刑呂氏春秋淮南子俱作徑於義爲通安定百骸毋使過勞凡所營爲皆審顧和緩毋得率意徑行則陽氣不暴越而陰不能干之也定者處置得所之謂晏定也陽生陰殺德刑所分而天時物理不能有陽而無陰惟陽不越而陰不縱則雖陰之浸長不可遏抑而循其柔靜之性晏安以處不與陽爭則雖成而不害矣此節所言與養生家

之說有相近者君子以修身俟命節取之可也然亦止此而已矣過此以往則爲魏伯陽張平叔之邪說矣

角解蟬始鳴半夏生木堇榮

解胡買反

解者新茸生則舊角脫也堇字今作槿榮花也

是月也毋用火南方

用火者焚蕪枯葳之類時南風大至恐其延燒宅樹

可以居高明可以遠眺望可以升山陵可以處臺榭

可以者偶然之辭高明樓觀也遠眺望謂遊歷曠覽也
案土曰臺臺上有堂序而無室曰榭是月溼蒸鬱溫故
於四者宜也

仲夏行冬令則雹凍傷穀道路不通暴兵來至行春令則五穀晚熟百騰時起其國乃饑行秋令則草木零落果實早成民殃於疫

雹凍雹如凍也道路不通盜賊劫奪也晚熟後熟當熟不熟騰食苗葉蟲百種類不一也

右第五章

季夏之月日在柳昏火中旦奎中

季夏日月會於鶉首而斗建未之月也房心尾皆爲大火此言火者謂心爾以大統歷法算之大暑日在井二十九度昏氏七度中旦婁五度中

其日丙丁其帝炎帝其神祝融其蟲羽其音徵律中林鍾
其數七其味苦其臭焦其祀竈祭先肺

音同
誼夏

林鍾黃鍾下生之律蔡氏曰全六寸積十一萬八千九
十八分

溫風始至蟋蟀居壁鷹乃學習腐草爲螢

蟋蟀促織先已生草閒至此月乃依人壁下陰氣動之
徵也學習者謂雛鷹初學盤旋數飛爲搏擊也仲春鷹
化鳩至仲秋乃復化鷹而此言鷹者益以知鷹鳩之化
非果變其形質矣螢雌雄相逐蓋亦卵生或此月蒸溽
閒有腐草化之者爾

天子居明堂右个乘朱路駕赤駟載赤旂衣朱衣服赤玉食菽與雞其器高以麤

明堂右个謂是南鄉西偏室

命漁師伐蛟取鼉登龜取龜

漁師掌漁之官用眾力攻曰伐蛟如龍無角似蛇有足取術致之也鼉豕首龍身而短登進龜以下故尊之曰登龜似鼉而大頭有瘡累蛟龜鼉皆能穿隄沒舟故伐取除害而收甲肉之用焉鄭氏曰周禮曰凡取龜用秋時是夏之秋也作月令者以爲此秋據周之時也因書於此似誤也其說是已

命澤人納材葦

澤人澤虞材蒲柳可爲矢者葦蒲葦條可織器時方堅
勸故令採而納之

是月也命四監大合百縣之秩芻以養犧牲令民無不咸
出其力以其皇天上帝名山大川四方之神以祠宗廟社

稷之靈以爲民祈福

令力征反共九
容反爲于僞反

四監高誘謂是四郡大夫秦置郡有守有尉有監作月
令時秦未併天下惟立百縣以四郡統之秩許慎曰積
也謂程粟咸出其力者供秩芻也四方方望之祀率天
下以奉郊社宗廟求盡其報本反始之誠而已專以祈

福言之月令之所以不醇也

是月也命婦官染采黼黻文章必以法故無或差貸黑黃倉赤莫不質良毋敢詐僞以給郊廟祭祀之服以爲旗章

以別貴賤等給之度

貸他得反
別必列反

婦官典婦功染采染人也婦官主紘繡黼黻文章之事染采主染黑黃倉赤之色凡繡白與黑謂之黼黑與青謂之黻青與赤謂之文赤與白謂之章法故謂舊制貸與貳通無或差貸謂配合不亂也倉與蒼通深青色質正也謂各如其色之正良明好也旗周禮司常之九旗章旗上徽識等給之給蓋級字之譌秦人以功級授爵

謂爵位之高下也

是月也樹木方盛乃命虞人入山行木毋有斬伐

行下孟反

虞人山虞行巡視

不可以興土功不可以合諸侯不可以起兵動衆毋舉大事以搖養氣毋發令而待以妨神農之事也水潦盛昌神農將持功舉大事則有天殃

興土功合諸侯起兵皆大事也搖者惟撓不甯之意養氣長養之氣令卽三者之令不特不於時舉事且不預爲期戒示以農隙有事令衆不安於農務持操也大雨時行而水潦暴集高者瀦之下者瀉之以爲旱澇之防

功方操急不可妨也神農農之神也言神農者神明其事以示警戒

是月也土潤溽暑大雨時行燒薙行水利以殺草如以熱

湯可以糞田疇可以美土疆

疆其兩反

土潤溽者溫氣上騰溼氣蒸變也暑者蒸氣迫起鬱熱充塞也時行者以時而不爽也立秋之前恆有三日大雨大小早暮遞相增減如次序然薙刈也燒薙者燒其所薙之草也行水瀦水於燒薙之地而引注之於田也利以殺草者此帶灰之水至田疆閒則草爲之死雨止日出水方溫而行之則如熱湯灌沃草無不死者也田

疇熟田土疆疆棄之土萊田也糞者滋益其見在之禾
美者肥美其地令來歲可耕也此蓋農官趣民爲之也
季夏行春令則穀實鮮落國多風欬民乃遷徙行秋令則
巨隰水潦禾稼不熟乃多女災行冬令則風寒不時鷹隼
蚤鷩四鄙入保鮮加字相然反欬苦蓋反
鮮落不待黃熟風撼落也風欬感風而欬女災墮孕也
隼鷩也鷩搏攫也

右第六章

中央土

作記者以四時分配四行而土無所措乃取麻家每季

十八日二十六分二十五秒爲土之說又以四季亦無定屬復用火土金相生之次及夏火秋金不相見之說割據立秋以前十八日有奇爲土王而不能以月日名之遂用在地五方之號冠以中央焉央猶盡也謂四方盡以此爲中也蓋嘗論之天之有五行與四時互成其用並行不悖而非有一成之模限眾理以必出於一轍此天之所以圓妙不測而非私智之所可度者也今乃損其固有而益以本無其不足以與於天之廣大明矣氣者資生之氣也故土周乎木火金水而皆資焉無能離也德者成用之德也故信行乎仁禮義知而皆成焉

無能離也。割土於木火金水之外，則土滯而木火金水之化亦浮矣。四時無時而離乎土，四方無往而不可以爲中。舍東西南北之外而據一，以爲中央，則東者見之，謂之西南者見之，謂之北中央之名，且不足以立。而況拘土於其墟哉！且此篇之制，一歲十二月時應乎氣，斗柄應乎辰，律應乎數，因時行令，有若畫一而不可以或違。乃每月之令皆三十日，有奇而季夏之月所正用者，割去十八日，有奇，惟十二弱而已。其亦自相刺謬矣。以律言之，林鍾之應亦止十有二日，而其云黃鍾之宮者，豈孤行一律而商角徵羽之不備，亦將何施？其云天子

居大廟大室傳註以爲中央之室則四方十二室周回
列墉而此室者亦從何門而入矧云上員下方則此室
當屋脊之中何所置牖而異於幽窳邪是其迂誕拘牽
而不成義審矣淮南子知十有八日土王之非而統以
季夏一月爲土德差爲可通然於四時之化夏之火王
獨詘其三之一亦矯強而無實其曰律中林鍾似也而
又曰其音宮則音律亦相乖背矣要之以私意役天曲
成一定之制則固無彙之可者也惟中雷之祀舉以是
月於禮爲得餘皆小道曲技之瑣言耳

其日戊己其帝黃帝其神后土其蟲倮其音宮律中黃鍾

之宮其數五其味甘其臭香其祀中霽祭先心天子居大廟大室乘大路駕黃駟載黃旂衣黃衣服黃玉食稷與牛其器圓以閎

大廟大室之大並他蓋反餘音同孟春

黃帝軒轅氏以土德王后土土神后君也土爲四行君也俛無毛者龜鱓之屬五者土之生數於河圖爲中宮不用成數者卜筮之用數止於九也筮法無五而用五者初揲之五陽之應也卜或用五無所考爾宮五音之長其數八十一黃鍾之宮者凡用律皆備五音還相爲宮黃鍾爲宮則林鍾爲徵大簇爲商南呂爲羽姑洗爲角此或獨以宮應而不備四音之謂說見上節甘者土

爰稼穡其味甘香亦五穀之氣中霤之祀於室中西南
隅牖下古者穴居方中開霤取牖爲霤之狀而祀焉大
廟大室舊說以爲中央之室說見上節大路殷路鸞路
大路亦皆按時飾色朱路元路皆大路有鳴鸞互文見
之然設色玳強亦不必詳也黃言駟者赤馬帶黃色閔
口狹而腹寬也

右第七章

孟秋之月日在翼昏建星中且畢中

孟秋日月會於鶉尾而斗建申之月也建星當斗十六
度以大統麻法算之處暑日在張七度昏尾九度中且

昴六度中

其日庚辛其帝少皞其神蓐收其蟲毛其音商律中夷則

其數九其味辛其臭腥其祀門祭先肝

少時照反
中陟仲反

秋王在金庚辛金幹故吉少皞金天氏以金德王蓐收

金神摧辱萬物而收藏之也迎秋祀之走獸曰毛商徵

三分益一上生之音其數七十二濁之次也夷則大呂

下生之律蔡氏曰全五寸五分五釐一毫半二寸七分

二釐五毫積十一萬五百九十二分九者金之成數於

河圖位在西辛腥者金之味臭金之味臭甚微察之則

審要言味臭者皆自化之所自成言之不可以迹求也

門者大門自外入向內先由乎門德主於納故秋祀之
肝木藏金克木故爲養道之重者

涼風至白露降寒蟬鳴鷹乃祭鳥用始行戮

白露之降在仲秋而記於是月也時或有降而記其始
也降者升已而下之謂寒蟬蟄也鷹之祭鳥或殺之而
不食有如祭也行戮者自搏殺而食之用始云者祭已
乃戮也

天子居總章左个乘戎路駕白駱載白旂衣白衣服白玉
食麻與犬其器廉以深

總章左个謂是西向南偏室戎路革路白馬黑鬣曰駱

麻麻蕢麻實本草謂之火麻仁廉方而有觚稜也

是月也以立秋先立秋三日大史謁之天子曰某日立秋
盛德在金天子乃齊立秋之日天子親帥三公九卿諸侯
大夫以迎秋於西郊還反賞軍帥武人於朝軍帥之帥所類反下同朝

直遙反除音同孟春

軍帥六軍之長武人軍右環人之類

天子乃命將帥選士厲兵簡練桀俊專任有功以征不義
詰誅暴慢以明好惡順彼遠方將子亮反好呼報反臨烏路反

厲磨治也兵矛戟之屬簡挑選練訓習桀俊勇力之士
有功曾著戰功者以其嫻習軍政威名動物故專任之

而桀俊者爲其用也詰誅聲罪致討暴虐民慢慢上皆
所云不義也詰誅之則天下諸侯知天子建侯欲其尊
王愛民而不然則惡而必討遠方之國無不順服矣

是刈也命有司修法制繕囹圄具桎梏禁止姦愼罪邪務
搏執

法制律令之科條也修者稽考而舉行之繕治也謂厚
其茨棘謹其關鍵具造也姦愼法邪行惡愼罪者謹定
其罪也手執曰搏械繫曰執務搏執者如今之訪拏然
命理瞻傷察創視折審斷決獄訟必端平械初良反斂
丁亂反下同
理舊說謂夏后氏刑官名於經傳無確據蓋亦秦官爾

在周爲士師非常曰瞻手足捶擊曰傷察詳閱也刀刃所傷曰創撲斷筋骸曰折皆驗之以坐抵償也端求得其端而詳之平中也

戮有罪嚴斷刑

戮有罪者大罪速卽於刑若今不待冬決者也嚴詳確也斷刑者定五刑之屬以待決也

天地始肅不可以羸

羸者饒益之意謂施惠行賞也

是月也農乃登穀天子嘗新先薦寢廟

穀黍稷稻粱之總稱其早熟者皆以是月登嘗新者所

嘗非一隨登而隨嘗之

命百官始收斂

收斂其祿田之入於此月始也

完隄防謹壘塞以備水潦

寒蘇則反

隄護岸防障水衝壘以土塞以木石水潦秋霖漲

修官室坏牆垣補城郭

坏培也牆宮牆垣圍圃牆修坏補皆因仍而葺治之蚤
穡已登晚稼未熟農功小訖薄用之以防秋霖

是月也毋以封諸侯立大官毋以割地行大使出大幣

使色

吏反

立猶爰立之立大官公卿也割地以慶賞諸侯大使謂公卿出聘大幣大聘用幣豐厚

孟秋行冬令則陰氣大勝介蟲敗穀戎兵乃來行春令則其國乃旱陽氣復還五穀無實行夏令則國多火災寒熱不節民多癘疾

大他益反復如字扶又反還似宜反

陰氣大勝謂暴寒殺草介蟲解也穀稻來來侵伐也陽氣復還者蒸暑而雨物生藹萋不節時寒時熱

右第八章

仲秋之月日在角昏牽牛中旦觜觸中

觜子斯反俗音即委反者誤

仲秋日月會於壽星而斗建酉之月也以大統曆法算

之秋分日在翼十九度昏斗十二度中旦參九度中

其日庚辛其帝少皞其神蓐收其蟲毛其音商律中南呂

其數九其味辛其臭腥其祀門祭先肝

音同孟秋

南呂大簇下生之律蔡氏曰全五寸三分積十萬四千

九百七十六分

盲風至鴻鴈來玄鳥歸羣鳥養羞

盲風猛疾之風秦人語也來者初自塞北南飛暫止中
土也歸者往於其所自來之稱羣鳥鶯雀之類羣飛者
養蓄也所食者曰羞謂蓄聚草木之實於巢穴以備雨

雪

章以畫績裳之章以紵繡有恆者十二章降殺之等制者形也式幅之多寡裾袂之侈約也長短以人身爲節而必稱也深衣齊踝冕服覆趺量稱之多少也自天子及后而下歲所成衣服必有稱數循其故額不得增損也冠帶亦有制度及量如常式具之常亦故也

乃命有司申嚴百刑斬殺必當毋或在撻枉撻不當反受

其殃

當丁浪反
撻女教反

嚴者鈎考詳審而定其罪也百刑五刑之條目以百槩之也斬斷也謂宮刑劓殺則大辟也枉屈也撻壞法也反受其殃者謂故入人罪卽以其罪反坐之

是月也乃命宰祝循行犧牲視全具案芻豢瞻肥瘠察物
色必比類量大小視長短皆中度五者備當上帝其饗

孟反量呂張反中
涉仲反當丁浪反

宰大宰祝大祝犧牲郊祀之牲郊以仲冬於此案視之
三月在滌閱省如法卽養之於滌也全具謂無疾癘傷
折案臨而考之也草曰芻穀曰豢案考使之豐潔也察
物色者揀其毛之純者比合也比類牛羊若豕色齊一
也大小以形體言長短以角言五者全具一肥二物色
三大小四長短五其者庶幾之辭

天子乃難以達秋氣

難諾何反

稱天子者明諸侯以下所不得用達暢滌其陰之鬱滯
以犬嘗麻先薦寢廟

麻始登也

是月也可以築城郭建都邑穿竇窖修囷倉

可以者或可之辭農或蚤收功或不容待則爲之也築
城郭所以建立都邑有先君之廟曰都無曰邑竇所以
行水窖所以藏粟囷曰囷方曰倉

乃命有司趣民收斂務畜菜多積聚

趣七玉反
畜丑六反

有司田官收斂穫也畜菜者北土寒多無青蔬秋則瓜
瓠之屬乾之以禦冬也積聚謂芻藁薪蒸

乃勸種麥母或失時其有失時行罪無疑

麥以接五穀之窮恐以方斂而怠故急趣而以刑糾之
疑矜宥也

是月也日夜分雷始收聲蟄蟲坏戶殺氣浸盛陽氣日衰
水始涸

收聲者陽氣或出微弱散緩不能成聲如斂聚退縮也
坏益而小之也水潦水

日夜分則同度量平權衡正鈞石角斗甬

春分較正之所以謹出秋分較正之所以謹入

是月也易關市來商旅納貨賄以便民事四方來集遠鄉

皆至則財不匱上無乏用百事乃遂

易以鼓反
來落蓋反

易治也謂修除其道路邸舍也來招徠之也貨賄泉布器用之屬有來賣者則得其器用有來買者則得其泉布皆便民也四方侯國遠鄉六鄉相去二百里者百事國所營造遂成也

凡舉大事毋逆大數必順其時慎因其類

大事兵戎力役之事大數時與類也類者事之宜物之便也自此月訖冬皆可次舉大事故於其始戒之

仲秋行春令則秋雨不降草木生榮國乃有恐行夏令則其國乃旱蟄蟲不藏五穀復生行冬令則風災數起收雷

先行草木蚤死

恐欺元反復如字
扶又反數所角反

復生者不黃熟而更苗葉也風災大風偃禾收雷先行
不待秋分雷先收聲也

右第九章

季秋之月日在房昏虛中且柳中

季秋日月會於大火而斗建戌之月也以大統麻法算

之霜降日在角十二度昏虛二度中且井二十九度中

其日庚辛其帝少暎其神蓐收其蟲毛其音商律中無射

其數九其味辛其臭腥其祀門祭先肝

射羊益反餘
音同孟秋

無射夾鍾下生之律蔡氏曰全四寸八分八釐四毫八

絲半二寸四分四釐二毫四絲積九萬八千三百四分
鴻鴈來賓爵入大水爲蛤鞠有黃華豺乃祭獸戮禽非呼瓜反
來賓者漸寒鴈急南征甫至中土卽往江表如賓之不
久留也爵黃雀大水海也國語云爵入於海爲蛤爲者
偶有之鞠與菊通獸之小者或謂之禽

天子居總章右个乘戎路駕白駱載白旂衣白衣服白玉
食麻與犬其器廉以深

總章右个謂是西鄉北偏室

是月也申嚴號令命百官貴賤無不務內以會天地之藏
無有宣出內奴答反

貴賤兼農人而言內斂也會合也天地之藏者秋高物
皆堅燥天地之所以利民藏者也宜露也出在外之稱
謂委於露地不收也

乃命冢宰農事備收舉五穀之要

要如字
於堯反

舉定而頒之要計會之冊籍以覈公田之入定貢賦之
則者也

藏帝籍之收於神倉祇敬必飭

祇章
移反

神倉黍稷所藏祇專謹也飭謂謹其斂揚暴慢慎其苦
蓋潔其困庾

是月也霜始降則百工休乃命有司曰寒氣總至民力不

堪其皆入室

工務也謂農人之百務休息也有司都鄙長民之吏入室令得安居省役

上丁命樂正入學習吹

吹笙奏及舞者之籥

是月也大饗帝嘗句犧牲告備于天子

大饗帝郊也嘗秋祭於四時之祭爲大犧牲郊與嘗之犧牲告備者前月已使宰祝行視養之於滌至此益充肥故告也

合諸侯句制百縣爲來歲受朔日與諸侯所稅於民輕重

之法貢職之數以遠近土地所宜爲度以給宗廟之事無有所私

合總會而頒之法也制命也秦謂天子詔令爲制其名始此朔日十二月之曆及所行之時令也稅民輕重之法雖有恆制而猶必每歲頒之使諸侯不得輒爲增損若今時歲給易知繇單是也貢職者貢於天子之常職遠近以制輕齋本色之異土地所宜以制出產有無之則亦必歲頒之者防所司詐矯上旨非法徵求也無有所私言不得以奇褻之物貢獻取悅此皆歲終頒行來歲之事而於季秋行之者自秦文公獲黑龍自謂德應

水瑞改建亥之月爲歲首記者因之

是月也天子乃教於田獵以習五戎班馬政命僕及七駟咸駕載旌旄授車以級整設于屏外司徒摺扑北面誓之天子乃厲飾執弓挾矢以獵命主祠祭禽于四方

載禮代反

教於田獵者寓兵政之教於獵也五戎五種兵器弓矢一及二矛三戈四戟五班定也馬政齊馬之高卑疆弱配服驂也僕戎車僕駟主駕稅之官七駟義未詳按逸書言天子有七萃萃副車也則七駟其分駕副車者與咸駕備法駕也載建也析羽爲旌繼帛爲旒旗不一而但言旌旒者略文授車謂授軍帥以下車使其御白駕

也以級者自軍帥至七十二人之長駕有先後車有部
分各視其級之尊卑也整者齊也皆駕而整齊列爲陳
以聽誓也屏外者揭纏旃以爲門外暫立屏翳象天子
外屏而車止其外也扑以楚木爲之長三尺搢插之革
帶間示用刑也北而誓者陳南鄉也厲飾戎服謂韋弁
服也主祠典田祭之官禽所獲之獸也四方周禮所謂
以祀祊也此教獵之制與周禮仲冬之狩以大閱者多
同而以爲季秋之令者亦秦以建亥爲歲首故是月爲
歲終而以畢冬政也

是月也草木黃落乃伐薪爲炭

不戒生氣且堅實耐熱也

蟄蟲咸俯在內皆瑾其戶

瑾塗塞也以不復出知其俯而塞戶也

乃趣獄刑毋畱有罪

趣七玉反

速斷而決遣之勿使營脫及淹累干連者

收祿秩之不當供養之不宜者

當丁浪反

收削奪之也祿官所食粟秩車服供養國所周給者皆老孤子之類不宜謂若年未及養而增年冒養及雖老而敗德不堪養者與祖父非果死事而詐冒求恤之類是月也天子乃以犬嘗稻先薦寢廟

稻始熟也

季秋行夏令則其國大水冬藏殃敗民多飢噉行冬令則國多盜賊邊竟不寧土地分裂行春令則煖氣來至民氣

解惰師興不居

藏沮浪反竟居影反煖許遠反解居監反

冬藏禦冬之穀菜殃敗鬱腐也飢鼻窒噉歎氣皆風寒之病土地分裂叛者割據也解惰慵弱無力師興不居疲於奔命也

右第十章

孟冬之月日在尾昏危中旦七星中

孟冬日月會於析木之津而斗柄建亥之月也以大統

麻法算之小雪日在房三度昏室七度中且張六度中其日壬癸其帝顓頊其神玄冥其蟲介其音羽律中應鍾其數六其味鹹其臭朽其祀行祭先賢

音同孟春

冬王在水壬癸水幹故吉顓頊高陽氏以水德王元冥水神水之德幽元而冥闇也介蟲龜鼈鱉蛤之屬羽商三分去一所生之音其數四十八音之最清者也應鍾姑洗下生之律蔡氏曰全四寸六分六釐積九萬三千三百一十二分六者水之成數位在河圖正北鹹水味朽者水漚漬之臭也行者行道之神位在廟門外之西爲轍壤厚二尺廣五尺輪四尺有遠行則驅車犯之而

去祀之者以菩芻棘柏爲主於轍上奠俎於其主南以
東冬祀之者取象於水之流行弗阻也腎水藏祭先之
義未詳

水始冰地始凍雉入大水爲蜃虹藏不見

見賢
遍反

地凍者地中上升之水氣凍而地爲結坼也大水淮水
蜃大蛤國語云雉入於淮爲蜃淮四瀆之大者故與海
俱爲大水虹藏不見者以爲人所不得而見有如藏也
虹之見繇疏薄之雨反映日光而成采色其輪圓者效
日輪爾半出地上者其見必以斜日側倚於地也今以
水向日而嘆從外視之爲圓暈有五色可以類驗舊說

陰陽不正之氣所感其說未是孟冬之後日漸向南去
人益遠雖有虹而人不正當其外無絲見之且於時陰
雨必濃無有霏微夾晴之雨則亦無絲成也仲春日去
南與人近雨晴相雜故復見焉

天子居玄堂左个乘玄路駕鐵驪載玄旂衣服玄玉
食黍與彘其器閔以奄

元堂左个北鄉西偏室**元**路以黝漆飾路鐵黑色馬深
黑色曰驪奄者器口狹也

是月也以立冬先立冬三日大史謁之天子曰某日立冬
盛德在水天子乃齊立冬之日天子親節三公九卿大夫

以迎冬於北郊還反賞死事恤孤寡

音同孟春

冬夏不言諸侯文偶略爾賞謂誅

祭之孤寡死事

者之妻子

是月也命大史覈龜筮占兆審卦吉凶

大他蓋反

血祭曰覈筮著莖也既覈龜及筮因卜筮一年之事占
詳視兆龜象審詳論卦筮數吉凶兼兆卦而言周以建
寅之月祭龜著而卜筮一年內之休咎秦以建亥之月
爲歲首盡廢三正故於此月行之

是察阿黨則罪無有掩蔽

是審也察糾察阿私黨護施之重刑以撻發羣臣使相

攻訐此蓋秦之虐政

是月也天子始裘

朝祭亦服之於裼衣之內天子裘羣臣乃敢服

命有司曰天氣上騰地氣下降天地不通閉塞而成冬命百官謹蓋藏命有司循行積聚無有不斂坏城郭戒門閭修鍵閉慎管籥固封疆備邊竟完要塞謹關梁塞徯徑上

掌反藏徂浪反行下孟反積子賜反竟居影反豐

塞上於笑反下先代反塞徯上蘇則反下胡雞反

天氣上騰者生物之氣高引而清剛也地氣下降者發生之氣含於地中而不蒸起於地上也如此則陰陽不交而化機塞矣冬之爲言終也謹蓋藏以下皆法天地

閉藏之政命有司分命之居室曰蓋倉困曰藏謹繕修
嚴密也無有不斂不使露積也坏與培同戒嚴譏出入
也鍵戶櫪牡閉櫪牝也管鎖籥開鎖者封疆邊竟之溝
塹固者修治之備者嚴其防守也要塞扼要之塞敵所
出入之險隘也梁橋也徯與蹊通山閒私路徑田閒小
道也凡此既以法冬氣之閉塞而農事已畢兵戎盜賊
恆於此而起溝洫田野平可恣驅馳而民皆入室偵
探候望之尤難故必於此謹之焉

飭喪紀辨衣裳審棺槨之厚薄塋巨壟之大小高卑厚薄
之度貴賤之等級

衣裳五服之衰棺槨之厚薄謂四重三重二重一重不重也塋兆域邱壟冢也厚薄之度言厚葬薄葬之度成人與殤之異也貴賤之等級天子至庶人之差也此二句通喪禮而言

是月也命工師效功陳祭器按度程毋或作爲淫巧以蕩上心必功致爲上物勒工名以考其誠功有不當必行其罪以窮其情

當丁浪反

效呈也功者所作已成之器陳閱驗之祭器器之重者舉之以槩用器度大小之制程重輕之量以巧之禁方作時已日戒之至此驗之審其遵否此指用器而言功

精好致密緻也物勒者每物刻識之驗其耐用之久近以徵其果否功致也行其罪以窮其情者不以過誤貸之則冒破冗食及故爲淫巧而妨實用之情者無所逃也

是月也大飲烝

烝眾也不言天子者合上下而飲以農功畢與眾樂之也其禮亡考蓋亦後世大酺之類爾

天子乃祈來年于天宗大割牲于公社及門閭臘先祖五祀

先悉薦反

宗尊也又榮也天宗者六宗之統名日月四時寒暑星

辰水旱皆天之神故曰天宗大割大牢王所爲民立社爲公社對自立社爲私而言也社少牢之祀而用大牢者爲祈年故重之及者被及之辭門閭磔藏之事亦割祭也臘者於周爲蜡秦漢謂之臘謂大獵得禽而祭也先祖者旣臘而後祭宗廟蔡邕獨斷曰青帝以未臘卯祖赤帝以戌臘午祖白帝以丑臘酉祖黑帝黃帝以辰臘子祖蓋先祭祖廟之八日而臘也五祀四時各一祀而此合祭之者歲終大報之也祈年臘皆歲終之事而行之此月者用周正也大抵月令一篇雜三代及秦禮而錯記之非一正之典讀者勿泥焉

勞農以休息之

勞力
滋反

既蜡之後黨正屬民飲酒

天子乃命將帥講武習射御角力

將子
所類反

講武演軍陳習者教練士卒角力投石抵撲

是月也乃命水虞漁師收水泉池澤之賦毋或敢侵削眾

庶兆民以爲天子取怨于下其有若此者行罪無赦

爲于
反

水泉流水池澤止水其賦漁蟹葦材水澤之利贏縮無

恆不能制爲定額故吏或任意多取是以必嚴禁之

孟冬行春令則凍閉不密地氣上泄民多流亡行夏令則

國多暴風方冬不寒蟄蟲復出行秋令則雪霜不時小兵

時起土地侵削

復如字
扶又反

地氣上泄草木或有生者不時不以時降方冬竟冬也

右第十一章

仲冬之月日在斗昏東辟中且軫中

辟與璧同
必亦反

仲冬日月會於星紀而斗建子之月也按麻經歲差之

法以堯典中星考之冬至日在女虛之交及漢元和冬

至日在斗二十一度雒下閔所測星度斗凡二十六度

四分度之一則元和冬至之日初入斗六度大雪日在

箕三度以歲差之法逆推已往當周之初千歲而遙相

去幾二十度冬至日當在女牛之間今云日在斗亦明

此記爲周末秦初之書無疑已然既定仲冬爲日在斗以歲差從元和上算周末當亦在斗初去孟春六十一日凡行六十一度自斗至室七十五度有奇而孟春章云日在營室則記者之不審甚矣要之一月日躔歷三十度彌則汎舉一月日在之處不可指一宿而言必以中氣爲正則前後可推而記法靡疏或以月初或以月終必至參差而不可以爲法非麻家之所得而據也今以大統麻法算之冬至日在箕五度昏奎十度中且翼十九度中

其日壬癸其帝顓頊其神玄冥其蟲介其音羽律中黃鍾

其數六其味鹹其臭朽其祀行祭先賢

音同孟冬

黃鍾十二律之君長九寸蔡氏曰積十七萬七千一百四十七分律之最洪長而濶者也

冰益壯地始坼鶡旦不鳴虎始交

壯堅也坼凍極而裂也鶡旦狀如小雞四足有肉翅本草謂之寒號蟲穴處冬則毛落夜寒則呼如求旦然是月地中微暝夜不復鳴

天子居立堂大廟乘立路駕鐵驪載立旂衣服立玉

食黍與菘其器閔以奄

大也蓋反

元堂大廟謂是北向正中室

飭死事

死者送死之事飭者修具之國君之裨歲一漆大夫士五十以上歲時月制之

命有司曰土事毋作慎毋發蓋毋發室屋及起大眾以固而閉地氣沮泄是謂發天地之房諸蟄則死民必疾疫又

隨以喪命之曰暢月

沮將處反
喪息沮反

土事土功蓋茨瓦室屋牆壁也起大眾亦謂土功而猶其也而閉謂天地之藏氣也沮者潰敗之意起土發屋蟄蟲露而寒死微陽洩露人得之疾疫至死喪也命名也暢充也命之曰暢月者謂當顧名思義養陽氣於地

中使充暢也

是月也命奄尹申宮令審門閭謹房室必重閉省婦事毋得淫雖有貴戚近習毋有不禁

重值能反

奄尹於周爲內宰主領奄官亦士人爲之非奄也審者譏其出入謹者修其帷薄堂後戶內曰室東西夾室曰房省察也婦事女功絜繡之事淫艷巧也貴戚王之內外宗近習王所寵幸也

乃命大酋秬稻必齊麴蘖必時湛熾必絜水泉必香陶器必良火齊必得兼用六物大酋監之毋有差貸

湛千廉反火齊之齊

才細反監古衛反貸他得反

大酋主釀之官於周禮爲酒人酋之爲言久也謂酒以久釀爲美也秫稷之黏者齊謂春治之一色熟也蘖麥芽以釀醴者時謂造之久熟也凡麴蘖以久者爲良湛漬米熾淮南子作饎蒸米將熟投湯中淪過而再蒸之也必粟者湛則淘洗淨盡饎則淪濾必清也陶器酒甕良者無罅罅敗酒火齊蒸之候也必得恰熟也物事也監之者臨視女酒造之羞貸謂違常法

天子命有司祈祀四海大川名源淵澤井泉

大川淮江河濟名源有名之水源淵深潭澤湖陂平地出泉曰井山下有水曰泉祈祀之者爲來歲雨澤

是月也農有不收藏積聚者馬牛畜獸有放佚者取之不

詰

穉子
賜反

積聚謂瓜果薪芻畜獸羊豕詰問也設此令以警惰民

山林藪澤有能取蔬食田獵禽獸者野虞教道之其有相

侵奪者罪之不赦

道徒
到反

蔬食榛芋鳧苳之屬教道告以有處侵奪謂暫置徑側

又往尋求後至者輒掩爲己有野虞執其禁詰而罪之

是月也日短至陰陽爭諸生蕩君子齊戒處必掩身身欲

寧去聲色禁者欲安形性事欲靜以待陰陽之所定

齊側
皆反

去起呂反
者時利反

陰陽爭者積陰在上不舍中位以錮微陽之生陽起而爭之也諸生謂凡諸生氣蕩內動也掩身者重裘衾以養溫氣身欲簡以形體言性生理也事欲靜以營爲言陰陽之所定者自此以後陽漸壯則定於進陰漸衰則定於退也冬至養生之事與夏至略同蓋微陰初生而慎堅冰之戒微陽初起而戒潛龍之用理雖異而功用同也

芸始生荔挺出蚯蚓結麋角解水泉動

解胡買反

芸薇也類豌豆苗叢生葉香俗謂之七里香荔一名馬蘭一名旱蒲葉似薤根可爲刷花紫碧色其子本草謂

之蠶實挺出出土勁銳貌蚯蚓結者出穴屈首下鄉也
麋似鹿而大情淫而遊澤四者皆一陽初起之徵

日短至則伐木取竹箭

箭小竹堅實可爲矢者一名箬凡竹木冬取則不蠹

是月也可以罷官之無事去器之無用者

去起呂反

謂權所建作者不復除造

塗闕廷門闕築圉圉此以助天地之閉藏也

塗丹望之闕雉門外兩觀廷內朝築圉圉者築其圍垣
城郭宮室前月已繕此則飭其小者

仲冬行夏令則其國乃旱氛霧冥冥雷乃發聲行秋令則

天時雨汁瓜瓠不成國有大兵行春令則蝗蟲爲敗水泉

成竭民多疥癘

雨王遇反

旱無雪麥不生雨汁水散雜下瓜瓠不成種壞也蝗蟲爲敗生蠨子癘癩也

右第十二章

季冬之月日在婺女昏婁中且氏中

婁落候反氏都離反俗讀都禮反者誤

季冬日月會於元枵而斗建丑之月也以大統麻法算之日在牛二度昏胃九度中且角十一度中

其日壬癸其帝顓頊其神玄冥其蟲介其音羽律中大呂其數六其味鹹其臭朽其祀行祭先賢

大他蓋反餘音阿孟冬

大呂黠賓上生之律蔡氏曰全八寸三分七釐六毫半

四寸一分八釐三毫積十六萬五千八百八十八分

鴈北鄉鵲始巢雉雛雞乳

鄉許亮反
乳而遇反

北鄉旋飛漸向北也巢架巢將以伏子雌雄雉求雌之
聲乳伏子也

天子居立堂右个乘立路駕鐵驪載立旂衣服立玉
食黍與彘其器閔以奄

元堂右个謂是北鄉近東室

命有司大難旁磔出土牛以送寒氣

難諸何反
出尺類反

有司方相氏大難自國中達鄉遂皆讎也旁猶方也四

郊皆磔不但門也出遣也土牛範土爲牛是月建丑丑
土而屬牛於是酷寒遣土牛於野若送此月之速往以
冀春暄此亦古禮之近於戲者先王以其無大害順人
情而爲之爾今制迎春作土牛而鞭之蓋本於此其以
爲督春耕之像者則流俗之譌也

征鳥厲疾

此句當在雞乳
之下簡錯在此

征鳥題肩厲也厲疾搏擊而飛迅速也

乃畢山川之祀及帝之大臣天之神祇

畢者或歲所未徧補畢之也帝古帝大臣有功德於民
者天神星辰之精祇衍文

是月也命漁師始漁天子親往乃嘗魚先薦寢廟

漁取魚於潛也詩云潛有多魚春秋魯隱公觀魚臧孫諫其非禮則天子往觀蓋秦之做政記者習爲故常而記之

冰方盛水澤腹堅命取冰冰以入

腹堅表裏凍結也取者取之山澤入者納於凌室

令告民出五種命農計耦耕事修耒耜具田器

令告令田官告也五種五穀之種出之視其燥溼量其多少計耦耕之事者古者二人合耦二牛合耒使入土深而赴土速也一井八家凡爲四耦而人必兩情相浹

牛必兩力相得故須預計定之使勿游移田器鋤鍤耨耨
菑之屬

命樂師大合吹而罷

大合吹以考仲秋以來學子之成藝罷者歲終令休沐
也

乃命四監收秩薪柴以供郊廟及百祀之薪燎

共九容反

秩積也大而析者曰薪小而束者曰柴薪用炊柴用燎
是月也日窮於次月窮於紀星回於天數將幾終歲且更

始更古

衡反

此言夏數之得天也窮於次者十二次元枵爲子而子

之半一陽初生於卦爲復十二辰之首也大寒日始躔於元枵越十五日正值子之半歲終之際日躔子之前半是十二次之窮也窮於紀者紀月之法二十七日半大弱而周天二十九日半稍弱而與日會一月之朔過於周天者二十七有奇凡十二朔而其贏者二十七日月又一周蓋一年十二會而十三周周與會既相符合故來歲正月之朔月復離於元枵之中而歲終之晦月在元枵之前半紀亦窮也星謂北斗回者周回運鄉也地之四方以東爲首季冬之終斗指艮方將回寅位又起於東也以此爲今歲之終而來歲之始所謂終始萬物

者莫盛於艮也

專而農民毋有所使

專靜也而汝也以農民爲君之農民親辭也靜養其力毋役使之以待其始播百穀也

天子乃與公卿大夫共飭國典論時令以待來歲之宜飭修明之國典周官之六典論講求時令十二月之令宜謂典令雖有故式而因時增損以通權宜必修飭而講論之孟春則以示百官小宰所謂正歲觀法象也

乃命大史次諸侯之列賦之犧牲以其皇天上帝社稷之饗乃命同姓之邦其寢廟之芻豢命宰歷卿大夫至于庶

民土田之數而賦犧牲以其山林名川之祀凡在天下九州之民者無不咸獻其力以其皇天上帝社稷寢廟山林名川之祀

大史之大他蓋反共九容反

次比次而差等之列謂同異庶姓之屬籍爵之尊卑國之大小也大史之職定世繫故命次之賦爲來歲賦也皇天上帝之祀郊也芻豢亦犧牲變文者以人道接宗廟也宰大宰歷序其親疏也合同異姓諸侯以其郊社尊之之理一也率同姓以其宗廟親之之分殊也賦畿內臣民以其羣小祀明天子之守也合而言之九州臣民無不獻力以致於天子之所尊親率天下以知所敬

愛而王道狹矣

季冬行秋令則白露蚤降介蟲爲妖四鄙入保行春令則胎夭多傷國多固疾命之曰逆行夏令則水潦敗國時雪不降冰凍消釋

天鳥
老反

蚤晨也介蟲龜鼈爲妖穿隄覆舟胎夭多傷犢雛不育也固疾沈固之疾命名也謂病證之名也逆氣厥上逆爲蠱隔喘呪之類國謂城郭

右第十三章

神託草卷六終